



نبيل عبداللطيف
(الناصر صلاح الدين)

أم القصايد

شعر عامية



الطبعة الأولى

الكتاب : أم القصايد

شعر : نبيل عبداللطيف (الناصر صلاح الدين)

التصميم والإخراج الفني : دار الرضا

للطبع والنشر

رقم الإيداع بدار الكتب : ٢٠٢١/٢٩٨٥م

الترقيم الدولي : 978-977-843-297-2

رئيس مجلس الإدارة

عاطف الجندي

المدير العام

رضا عبادة

مدير الطبع والنشر

العزب فتحي

٤ شارع مهندس عبدالمنعم – أرض أولاد علام

منطي – شبرا الخيمة – القاهرة الكبرى

ت : ٠١٢٢٢٩٥٠٢٩٢ – ٠١٠١٧٧٥٦٦٧٠

تصميم الغلاف الفنان / محمد مخلوف

مراجعة وتدقيق : مكتب الموهوب " د/ حازم الصبيحي "

جميع الحقوق محفوظة للمؤلف

إهداء ..

لأم الشعراء ..

~~

أولاً .. يقف القلم احتراماً وتقديراً وإجلالاً لأم الشعراء

..

ثانياً .. هي التي تبنت بيقين تام العديد من الشعراء .
فأصبحت تمتلك القلوب بتواجدها الدائم لكل عمل ينشر
وتقرأ بعين الناصح والمرشد والموجه والمشجع لكل
الشعراء الذين تبنتهم وأصبحوا أبناءً لها تربطهم
بخيط من الحرير

تلميذك :

نبيل عبد اللطيف الفقى
(الناصر صلاح الدين)

ما تستنّيش



باسيب روي

في الهوا تقابلك

وأنا جاي لك

و م اللهفة

أنا باطوي خطوط أرضي

مع المشاوير

وباتمى يكون لي جناح

يشيلني واطير

يا فرحة كبيرة بتخلّي

خيطان عشي

نسيجه حرير

باسيب عقلي في دنيا براح

بينده لك، بلا تفكير

باشوفك دنيا بتصالح

غريب سواح في ملكوتك

بلا تفسير ولا تدبير

وانا جاي لك

باحسّ بخطوتي أنفاس

بتجري بشوق،

ويسبقني السلام بالعين

كانك قلّمي والكراس

والهامك بيحضرني

ويكتب قصة العاشقين

قصايد صاحبة في الإحساس

بتؤمرني.. أحنّ والين

لأنك إيد طبيب ماهر

تداوي القلب من وجعه،

ترمّ الجرح

بعشق كبير عفيف طاهر

بيترقص في ليل الفرح

وبيغني حكاينا وأمانينا

لحدّ الصبح

أنا جاي لك

ومش خايف عيون الناس

ولا خائف من الحُساد

ولا خائف من الدنيا

لترميننا ف أراضى بُعاد

لأنك بيت بياؤينا

وتعريشة تدقّينا

وميّه وزاد

أنا جاي لك

يا ركن بعيد

وفي أبعد واحة

بصراحة

بالاقي الراحة

والنومة في حضن النخل

ودنيا بعطر فَوَاحَة
تَلَمّ الباقي من عمري
في أرض الضِلّ
عيونك ساحة وسماحة
يا شايفاني
أنا لوحدي في وسط الكل
أنا الفارس،
وانا أرضك، وانا زرعك،
أنا سيفك، وانا درعك،
أنا شكلك، وانا اسمك،
ولون خدّك، أنا رسمك،
أنا الحارس لباب قلبك

يَصْحَى الفجر في عيونك

تلاقيني على بابك

أنا جاي لك

في ضيِّ الشمس

قصيد همس في شجونك

تصحّيني أنا وقلبي

في محرابك

الغيرة



مليون سنة غيرة
وما بطلتْش أحنّ واغير
على رقيّ ركنت كثير
حاجات محتاجة للتغيير
كأني طير
مالوش عناوين غير الحيرة
كثير محتاج لتصيرة.. لتجبره
كأني أسير
مكتّف روعي بحبالها
ومش قادر بخاطري أطيّر
ومالكاني حاجات تانية

لا ليها حساب ولا تقدير
حاجات مخلوقة ع الفطرة
ما بافهمهاش
لا في امبارح ولا ف بكرة
ولا ف عمري اللي لسه ماجاش
كأني ف حلم بيطوّل
بيبدأ تاني م الأول
وفي الآخر مالوش تفسير
غير ان العشق مالكني
لعالم تاني واخدني
مدوّبني
ولما اصحى ألاقيني
باحنّ واغير

واعيش أيامي متلخبط بلا تبرير

كأني غريب مالوش مأوى

بيستقوى

في دنيا بتبدر السكة

بكسر إزاز على مسامير

عن الأسباب سألت كثير

تجاوبني،

كلامها بيجبر خاطر

تطمني

وتفرد شعرها سكة

بطول الرحلة والمشوار

وتأخذ إيدي م الفكرة

والاقي روعي بتسبح

وتكتب عن حكايتنا غُنا وأشعار

واقول يا صبر صبرني

يمرّ الليل...

واعيش فرحة

بضيّ نهار...

واغير ثاني.. واغير ثالث

على حبي.. على قلبي

واعاتبها تظمني وتطفي النار

مانا اللي العشق مالكني

ومش باغلب ولا باحتار.

التصويرة



والنبي عاجباني التصويرة
والضحكة اللي بتملى خدودك
باحتار ف عيونك ١٠٠ حيرة
وكان النغم اللي ف عودك
بيصحى جوايا الغيرة
وباغير من كل اللي شافوك
من غير مايسمّوا بتكبيرة
والنبي ما تخافي من الدنيا
حاربيها وفكّي التكشيرة
الناس محتاجة وتتمنى
لو مرة تسافر للفرحة

وانتِ اللي بتعطي التأشيرة
الناس حاسينك حاجة تانية
مش زي اللي انا حاسس بيها
وعيونهم يمكن بتداري
مش زي عيوني
امّا تشوفك بحاجات
مش ممكن أبدًا تداريها
أصل انتِ حكاية ف دنيايا
أنا وحدي اللي أقدر أحكيها
أنا شايفك أجمل قمراية
في الليل بتغنّي
أنا وحدي اللي اسمع أغانيها
أنا عايشك ضحكاية ف عمري

أنا وحدي اللي أفهم معانيها
أنا أصلي بأكلم تصويرتك
وباحسّ بقلبي وانا ف سيرتك
دائمًا مشتاق
وبأكلم روي كثير عن طبيبتك
عن حبي وعن حبك
عن ليل سهران بيقالب فيا الأشواق
أنا نفسي أشوفك فرحانة
والفرحة بتملئ التصويرة.

يا أم القصايد كلها



سَلَّمْتُ أَنَا

سَنَ القلم والمحبرة.. والكلمتين

وشربت آخر شفتيتين

هايبلُّوا ريق.. في دروب سنين

تمشي لورا بعرض الطريق

وكلام بيشهق من بعيد

كرشة نَفَس

وكان انا مخلوق وحيد

من غير ونس

باصص على الشوق اللي بان

من بين جريد

يشبه قوي قضبان حديد
ببهدّ روح متبعثرة
في بلاد تغرب سندباد
على مركبة متكسرة
فيها الأمانى مزقّة
ملّت ساعات الدققة
على قلب يتحدى الوهن
عوده الطري أصبح جمود
يشبه جليد..
سابق عناده ع الزمن
بيقوي روح..
لسّاها رابطة ع الحدود
مستنظرة رجعة غريب..

من طول سفر
يا ام القصايد كلها
قربت آمن بالبدع
ليلي العنيد
مستني ضي نهار
يقيد.. يشفي الوجع
مستني ضلك يترسم
عز النهار.. يطرح قمر
ويلم حلم من الشتات
من بين بواقي الذكريات
فينا حاجات مستسلمة لعلوم قدر
وحاجات كثيرة بتتقسم منها حكايات
قلبين سوا ف درب الهوا

بانين هرم

لا اتَهَزَّ عمره، ولا انكسر

يا ام القصايد كلها

ماعادش بيننا غير بواقي من عتاب

مع خوف ليصبح عشقنا زي السحاب

لما بينزل في الفضا

مش لاقى أرض ولا شجر

ولا خيمة تحمي من المطر

لحظة لقا.. لحظة رضا

في ليالي لسه حلمها.. يطول السهر

يا أم القصايد كلها

كل الحروف وقفت طابور

طوله السنين

شايقة الكلام بيخطي خوف

نولنا الحزين

عمال بيغزل في الأذى

ويروح بعيد آخر المدى

يرجع وشايل دمع عين

رغم اننا بنفرح قوي من ضحكتين

مع كل يوم بيننا ابتدا بنقطة ندا

ما تغيرتش من الظروف

يا أم القصايد كلها

ازاي دا عشق؟! ازاي دا حب؟!

وانا كل ما اطلع للسما.. أو آجي اشبّ

انزل بحسرة، وكسر قلب

زي الرضيع اللي اتفطم

ومألُهش ذنب
غير إنه كان مولود ضعيف
وما كانش يعرف في الألم
ولا حرّ أيام الشتاء، ولا برد صيف
ولا حسّ يوم لحظة ندم
وانت.. وانا
وبقينا نشبه عصفورين
مالهُمش ريش
بندقي بعض بحلمنا
وقادرين نعيش
يا أم القسايد كلها
قصتنا سيرة مطوّلة
ما يحدهاش حد الخيال

حواديتنا تحكي لبعضها

عن حلم كان كذا زينا

يحلم بحلم ما لوش مثال

مين فينا حل المسألة؟!!

هو القدر كتب الوصال

هو اللي فسّر حلمنا

خلاك نجمة ملألة

يادوب يشوفها من بعيد

قلبي أنا

عمرين طوال

أشواقنا عايشة مكملة

فيها الرضا.. فيها الهنا

صابرة قوي ومتحملة

أما الوصال

أصبح ما بيننا شئ محال

وانا وانتِ هانحطّ الجواب

قبل السؤال

مين فينا يقدر ع الحياة

بالشكل دا؟!!

لو حلمك اتأخر



اوعى تقول...

إن الشمس بتحفظ تفاصيلك قدي

أو.. ساعة ما بتزعل لدقيقة

أفكارها بتجيب وتودي

أو زيي امّا بافكر فيك وباتوه

والنوهة مش راضية تعدي

أو ساعة ما باشوفك بافرح

واتأمل في عيونك واسرح

وأوشوش في الساعة تهدي

طب اوعى تقول...

إن الليل اللي سهرته معاك

أنا عشته دقائق وثنائي

أو إن الليل المغرم بهواك

كان حبة حواديت وأماني

أنا زيّ سنين الشوق اللي ملاني

وخلّيتني باخاف...

كلّ أمّا تسافر وتغرب

لا تتوه في البعد وتنساني

أنا دائماً أتأمل صورتك

ألاقيني باسافر وباقرب

وبنرجع تاني...

مش قادر ولا لحظة انساك

وأحس دموعك على كفي

أبكيها معاك

واتمنى تضمك أحضاني

وكأنك مخلوق من قلبي

وأنا حاسس بيك

أنا باسمع صوتك مع نبضي

دقات تناديك

دا لأنك حلمي اللي انا عشته

وشفته بعينك

طب قول...

إن الوقت اللي ما بيننا

مش تحت حساب الأيام

أو إن الحرف اللي كتبته

مايقولش كلام
جربنا انا وانت العيش والملح
وبنينا للعشق مقام
حواليه الزينة، وزغاريد الفرح
ورمينا العالم والناس
ومشينا الدنيا لقدام
ونسينا حاجات وحاجات
ودقايق بتعدّ ساعات
كان فيها خصام
سلمنا قلوبنا لبعضينا
ورضينا...
مطرح ما تاخذنا الأحلام
هانعيش ونصدق

ونحقق...

على قد ما نقدر

بطلنا نفكر.. لو حلم اتأخر

راح نصبر تاني ونستنظر

ماهو بكرة الغايب يرجع

ونعيش...

وأملنا في لقانا بيكبر

إمام العشق



أنا وانت...

وليل سافر

يجيب الشوق

لأجل ما يكمل باقيته نهار

ويرسم صورة شمسية

وفيها الضحكة حرية

بتكسر طوق

حيطان فارضة علينا حصار

أنا وانت

ماعادش الخوف يخوفنا

ولا يهوّب لحلق الباب

إمام العشق تالتنا
وشيخ جامع لحارتنا
ف بيحارب بقلب جريء
ومش هائب، ولا خايف
شيطان كداب
وانا وانت...
معانا الخطوة والسكة
وألف طريق
وطول ما الفكرة فكرتنا
وحاسبينها سنين بكرة
ودنيتنا؛
فكل الخوف بيتحول
ما بيننا سراب

أنا وانت...

وحكايتنا كتبناها

فروع النخلة والصفصاف

ما بين التمرة والضلة

بنتبدل ليالي عجاف

ف ليه بنخاف

ونمشي الخطوة ع الأعراف

طريق الجنة ف إيدنا

ما تيجي نشيل هموم روحنا

ونكسر حيلة العتمة

بـ ١٠٠ كشاف

ونعمل خطوة معتادة

ف مطارحنا

تفرّحنا

ومانسلّمش أراضينا

لناس غيرنا

تجرّحنا

أنا وانت...

وقلب الليل

ولا عمري هاخاف



أنا سامع صوت الريح

مع إن الشباك والباب

في الأصل صفيح

وماخفتش...

العالم بقى يشبه شواكيش

بتدقّ معادن

بتكسر في رغيّف العيش

بتهدّ مساكن

بيولّع منقذ قلاويح

في حوارى المولد

والمولد مليون مراجيح

أشجاره اللي فروعها حديد

بترشّ حجارة

في وشوش الخلق

وساعات دخان ونشارة

بتسدّ العين

عصافير العالم شبه المجانين

بتدور على حتّة ف شقّ

والكون بقى كله مغارة

بترعب في البني آدمين

أغصان الزيتون تتحوّل

لاسنان عفاريت

بتطارد في حمام

في الهجرة يموت

من أول ما يطير
ويخطي عيدان الكبريت
ودانات ما عادتش بترحم
بتفرقع في الزاد والقوت
العالم بقى منفى
وتوابيت للموميا
وأجسام المساخيط
العالم راكب طيارة
ودبابة ومدفع
بيدوس على سبل القمح
مش سايب حتى الروح
بهدوء تطلع
حكماء العالم حُكّامه

اللي بيدشّوا عظامه

ف قواديس الملح

جبروت بيقوّي ف تجار الموت

تجاعيدهم تشبه طبقات الدم

وفتوة بنبوته

هاحتلّ الأرض

وهايدبح فيها الأحلام

ويرشّ على الناس السمّ

وهايزرع في الدار النار

تتمدّد.. تحرق

في خطوط الطول والعرض

الناس ما عادتش بتستنى

و بتتمنى الموت

الناس بتسافر
بالغصب تهاجر
من غير مواعيد
والقطر اللي بيجري
من غير قصبان
من غير ما يطلع صوت
بيدوس ويلمّ الباقي
في مخيم مليان مطايرد
العالم بقى شلّة وعصابة
من ناس في الأصل ديابة
والديب امّا بيعوي
ف العرب تخاف
والخوف بقى فينا

بیرجرج فینا.. اتفکینا

وبلادنا بتشبه لفروع الصفصاف

لوهبت ریح نتقصّف

تتكسر فینا الأوصاف

وانا لسه المصري

اللي ما خُفتش

ولا عمري هاخاف

مقام العشق



في حساب الزمن
دا ما كانش شئ عادي
ريحة الرصيف تشبه ربيع
بالفل بيهادي

--

مش حر صيف
ولا عفرة ولا ريحة مكن
بتطير العصافير
بتخبّي وشّ الناس
ورا طيف وحدّ السيف
وحاجات بلا تفسير

بتَقَلَّ المواضع
تفتح ببيان للهوا
يتَهَزَّ قلب رضيع
واللهفة بتنادي
يا بيّاعين الورد
طلع النهار نادي
وكأنه بيدادي
يرشّ العبير ع الخلق
يفتح ببيان الرزق
ساعة الزمن...
دورانها صبر طويل
خطاويها ع الهادي
إحساس يروح لبعيد
عشّش في نصّ الليل

ومصاحب النسمة
كل البشر في العيد
ترقص كرقص الخيل
تتبدّل العتمة
وتعدّي ع الكراكيب
من غير ولا ترتيب
كل الكلام يتقال
حتى النغم.. ومواقع الموال
جاء اللي كان مرصوص
متشال على الدواليب
كل الصحاب سلّموا
واتكلموا ف حكايات
وصفوا المكان والزمن
والذكريات...

عشاق... وبيعدّوا الدقائق والساعات

وبيحسبوا النظرات

والناس شبه جدران

في الزحمة بتضايق

وساعات شبه قضبان

على بال ماهوش رايق

--

لكن...

العشق يشبه شيخ

عرّاف وله كرامات

بيسجّل التواريخ

ويسيب حاجات

وحاجات...

يكسر صدا

فوق الجبين طبقات

العشق...

شوارع وحارات،

وعيال.. تشبه عصافير

أفراحها في الكون بتطير

وكتير موال

بيلم الناس السهيرة

من زمن الحيرة

في عباية وشال

وساعات...

كمشان همدان

وكأنه المذنب.. أو حد مُدان

مع إنه بريء وجريء

بيسافر مع خيط الشمس

وبيعافر على ألف طريق
لا يخاف من أرض الشوك
وسلوك اليأس
ولا عايش في حارات بتضيق
ولا غاوى الحبس
ولا خايف لو تعلّى حواجز
أو تكثر حواليه متاريس
العشق دا منهج، وكتاب ومدارس
وقصايد مالية الكراريس
سمّيه الفارس والحارس
سمّيه العشق...
اللي مثبت في وتاد الأرض
لو غاب هاتاكلها الريح
العشق...

له ألف مقام ومقام
له ألف ضريح
حواليه دراويش خُدام
وسُلام.. وساعات مجاريح
العشق دا هوا اللي مخلي
خطوط الطول...
تشبه لخطوط العرض
و الناس بتوَّس بعض
بتروح وبترجع
من غير تصاريح

جَرَبْتُ



جربت نَفْسَكَ تتكسر؟!

حسيت بآيه

لما اللي حبك...

كان يوم بينوي ع السفر؟

وعملت إيه؟

غير إن دمعك يوم أمر

تنده عليه

وتقول وتحكي للقدر:

أنا ذنبي إيه

غير إني حببت القمر

وسهرت ليه؟!

وفردت روحك ع الشجر

تشتاق إليه

..

جربت تدبل دمعك

تصعب عليك؟!

وتشوف خطاوي سكّتك

مش راضية بيك

لما تضلّ دنيّتك

أصل الحبيب خاصم عينيك

سأبك تموت من وحدتك

ف تهدّ نفسك في السكات

زي الورق لما بينشف في الهوا

والحلم يصبح ذكريات

ف الليل عليل من غير دوا

عايش بتستنى الممات

يصعب عليك تمر استوى

لمه التراب.. في الهَمّ بات

وتعيش غريب

من غير طيب

هو اللي عارف علّتك

هو اللي يقدر يبتسم

لما الليالي تشتتك

هو الأمل.. هو الأمان

لما الزمن ما عادش سامع صرختك

هو الفرح.. لما بيفرح فرحتك

شايكفك وطن



وشك في وشي

رغم الطريق لسا بهمشي

حسب الظروف

هنا أو هناك

وانا لسه باتعافى وبامشي

وساعات باطوف

واشمعنى انا شايكفك ملاك؟!!

حاسك صلاة من غير آدان

حاسك إمام

رغم البعاد اللي اتفتح حواليه ببيان

ساعات فرح وساعات خصام

حاسك معاني مرقصة فيا الكلام
حاسك ولي بيوفي ندره للزمان
ع الأرض نخلك مبتسم
صورتك جميلة.. مزينة فيا الحيطان
وشك بريشتي بيترسم
فيه ضحكة.. بوصلة موجّهاني للفرح
فارشة لي ساحات الغنا
موال بصوت المنشدين
تسابيح قلوب.. من غير سبّح
وربابة لامة المغرمين
يا مضيّفة ضي القمر
يسهر في حضن السهرانيين
صوتك أغاني.. والدعا هزّ الوتر

عطرّ أماني السوسنة

خلّاها تسجد للقدر

سجدة رضا م العاشقين

ما انا أصلي حاسك صوت حمام

عايش في أبراج الخجل

عمال يرفرف ع الشجر

مستني أغصان الأمل

تطرح لقا.. تطرح سلام

حاسك طيور جنة زمن

جاية تفرّق فرحها ع المحرومين

شايفك وطن

لامم عيال متغربين

شايفك دفا.. في سنين جفا

حاسك وفا

لامم في حضنه المجروحين

لحظة صفا

دعوة غريب هده الطريق

كل الطيور قالت آمين

دفا وحنان



حبيبتي...

لقيت الدنيا من غيرك

بلا معنى

سجدت بقلبي وبروحي

لرب كريم...

يرجّعنا ما يبعدناش

ما انا من غيرك اتشتت

واقول له يارب...

في حضن حبيبي تجمّعنا

وجمّعنا.. ما تفرّقناش

أنا سامعك

وصوت قلبك بيندهني
ويفرش طرحته خيمة
تغطيني من الدنيا
من الأحزان تريحني
كأنك عمر فوق عمري
ونور بينور الدنيا من الغيمة
في عيد الحب.. انا ف قلبك
وساكناني في نّ العين
عاهدت الله على حبك
وماشي ف دربك اتملى
دفا وحنين
ما هو انتِ الدنيا والفرحة
وكل الناس

باقول يارب انا عاشق
بيتعبّد في محرابك
ماليش غير حبها الدافي
صبغت الدم في عروقي
بلون إحساس.. بيندهك
في إيدك روي وسنيني
ونظرة عطف من قلبك
يا عشق العمر تكفيني

سببنا نعيش



كأنك عزم متشمر

بعمرى يشبّ

قدر مكتوب بيتشطر

وباسم الحب

أنا ماشي في ملكوتك

شجر أخضر بيتمخطر

ماغدتش قادر استغنى

وانا المغنى

اللي باسمها

ف حنين صوتك

باشوف روي بلا معنى

واحس بموتي ف سكوتك

تسامحيني وانا أسامحك

دا لا بإيدي ولا بإيدك

وانا شايف عيون قلبي

وعيون قلبك...

بتفرح لما نتقابل

تعيش عيدي واعيش عيدك

وانا وياكِ باتهنّي

واعيش السعد في الجنة

ما انا ف قربك

بالاقي القلب يتمنى

يكون في كفوفك الحنة

يكون فرحك و تنهيدك

واحسّ بفرحتك بيّا
ف سلام ايدك.. ونبض الفرح
واخاف ليغيب الدمع في عينيا
ويصبح جرح
هاستمّ روعي واحسبها
ف أماناتك
واسيب الباقي من عمري
على بابك
وهاستنى الأمل منك
لحد ما ييجي ويغير
في ناياتي وناياتك
يا فجر بعيد
وانا السهران في محرابك

وباترجى ساعات الليل

على دمعي ماتقساشي

أنا عايش على ريحتك

ولمسة إيد

قضيت عمري وانا ماشي

لحد ما شُفتك الفرحة

وساحة العيد

كأني طفلك الراقد على حجرك

في عز الشمس

وبتسمي على جبيني

بحروف رقوة بتحيني

في زمن اليأس

أنا باتحامى في ضلوعك

من الدنيا وزمن الصهد
باخبي خوفي في كفوفك
لاموت تاني.. وموتة بجد
وقلبك يقسى.. ينساني
على قلبي يكون جاني
بييني السد
يا عارفك وانتِ عارفاني
سيبينا نعيش على الدنيا
نوؤس بعض

خصام



خلينا نتخاصم كمان

خليني احسّ بلهفتك

وسط العتاب...

وسط الكلام...

خليني احسّ بفرحتك

كل اّما نرجع م الخصام

واشوف حلاوة بسمتك

لو امدّ إيدي بالسلام

عارفك طريق فرد الجناح

على سكّتي شبه الحمام

عارفاني على حجر ك كبرت

ما بقيتش اخاف غير م الفطام

عارفك حياة...

حلمي اللي عايش باحلمه

دايمًا باشوفه في المنام

عارفاني من قلبك شربت

ومليت عروقي بالغرام

قلبي الصغير بيعشقتك

خطوة زمن وسع البراح

عشقتك آدان...

صحاني أشكر ربنا

وافرد لبابه ١٠٠ جناح

سامع نداك ودقتك

على باب سنيني اللي ابتدت

شبه الصباح...

لما بيحضن بالدفا قلب النهار

عشقك طيور...

صبحت تزوق عشها بورد وخضار

تغزل أمل يرقص

على فروع الشجر

وتغني غنوة الانتصار

على كل أوجاع الهوا

نخطي سوا

عشقك دوا...

لو قلبي صابه الانكسار

عشقك مدد

أنا شلته للأيام

عشقك سند

وركنت ضهري عليه

عشقك كما الأحلام

أصحى ونام الاقيه

...

شوف يا عشق...

آخر كلام هاكتبه:

هازرع غيطاني شوق

وارسم حيطاني شجر

وفروعه طالعة لفوق

يطلق بخور للسما

ينزل مطر

يكسر حجارة الطوق

وإنا وإنتِ نسجد سوا
حامدين مجيب القدر
وزماننا لما يروق
وما عادش بيننا خصام
ما أنا أصلي حاسس لهفتك
في حروف آخرها كلام
باقراه في عينك إنما
يشبه لعيني تمام

مش قلت لك



ما تفسّريش الحلم

على كيف الهوا

أنا كنت لسه باتولد

كان قلبي عوده بيستوي

مركون على قلبك سند

دقة حياة بتقول مدد

يا حاجات كتير بتلّمنا

شاعت إرادة ربنا

القلب ينهج م الوجع

وتكوني ليه انتِ الدوا

انتِ وانا والحلم...

نشبه بعضنا

لحظة ما نغضب نبتسم

والصمت ينطق بالدموع

الحزن بيننا يبتسم

كالضيّ وعيدان الشموع

نضحك سوا

حزن الكلام يلمّنا

~~~

انتِ وانا...

في ساعات بتسبق بعضها

وبتجري وتسلم

ترمي الحروف متشبّكة

ومعاني تتكلم

مين فينا يقدر ع الخصام

وقلبه يتألم

~~~

طول الطريق بين الثوانى

بيختصر.. ساعة اللقا

والشوق بيطلع ع المواني

وينتظر.. ساعة اللقا

نفرد دراعاتنا سوا

فينا قلوب متشوّقة للملتقى

وما عادش باقي من العتاب

غير السلام...

نظراتنا جاية بحضنها

تسأل سؤال...

من غير جواب..

من غير كلام

شُفْنَا ابتسامة قلوبنا

فنسينا احنا كنا فين

وازاى رجعنا لبعضنا

بالرغم من ضيق المواني

وبحر كان آخره الغرق

فيه حاجة قاصدة تلمّنا

من بين مفارق الطرق

هوّ القدر

مش قلت لك...

أنا قلبي بنهج م الوجع

وانتِ الدوا

هذا الكائن



ارتاحي من هذا الكائن

وارميهِ...

وارمي له الشال الأسود

فيغمّي عينيهِ

ويشوف اللون الداكن...

يعميهِ

وبدال من توبك الاسمر

خليكِ ف ألوان الورد

ماهو جاي لك من عالم أغبر

مش باين في طريقه غير...

كذّ.. وهذّ...

وكأنه شَيْطَانُ أوْ جان
أوْ بارع في علوم السحر
وبيكْتَب ع الحيط أحزان
تقريها بألوان القهر
ارمي له الخيط والنول
وبواقي الغزل
وبعود كبريت
ارميه في الطَّلّ
وسيبّيه للزمن الغول
يتحول لرماد.. ويموت
ويسلّم على آخر دمة
وفارق عالم أخضر
وقصور وبيوت
خلّيه يتحسّر...

على ضيّ الشمعة
ويسلك روحه...
من حنك الحوت
أدي له مفاتيح المنفى
والحنّة الباقية من اللفّة
وسكينة ورُمح
وف زحمة زفة...
خليه يتكفّى...
شبه العصفور الميت
من أول جرح
بس انت ارتاحي
من هذا الكائن
وانشري فساتينك
على حبل الشمس

خليها تشوف النور
وتتحدّى بجرأة اليأس
من حبسة جدران ومساكن
نادي سنين الغربية...
ولمّيتها من الأرض البور...
خبّي عن عينك...
فوطّة مربوطة
ف آخر الشّماعة
لا تشمّي دموعه الدبلانة...
في نسيج الخيط
ولا عينك تلمح...
دوران الساعة المصلوبة
على عرض الحيط
أو سيدي ودانك...

لا هاتسمع رنات الفون
وصوابعك تلمس إحساسك
من غير ما تحسّ
ارميه على آخر نقطة...
في حدود الكون
وانسيه وكأنه الذكرى...
أما تعدي ما تهزّش نفس
وارتاحي من هذا الكائن
من لونه الداكن..
من وجع الجدران..
وحيطان ومساكن...
كات آوية هذا الكائن

يادي الجمال



يسرق ثواني من الفرح
ويدخلك مسجد حلال
يرتل قصائد للقلوب المتعلقة
بشوقها ف حبال
يادي الجمال.. يادي الجمال
لما العيون المتشوّقة
ترسم خيال
قمرية ساكنة في السما
ومفرقة
م الضيّ ورد ببيتسم
على كل بال

يادي الجمال

ف القلب فكّ الشرنقة

وما عادش شئ اسمه المحال

لما الورق ع الفرع كان واقف حزين

الشمس كانت في الدفا حضن السنين

قطرة ندا زي ابتسامة مشقشة

رقصة فراشة ف الهوا

غنّت غناوي الفرحانين

رجع الخضار جنة هنا

فاتحة ببيانها ع السما

يبقى الأمل ممدود

فارد بساط السفر

ف الكون مالهش حدود

يفرد جناح الحلم في الموال

ويطير زي النغم ع العود

فيقول:

يا سهرانين...

أدينا لسه بنبتسم

والضحكة بيننا بتتقسم

وتبان على خدين

فالقلب صابر كام سنة

ما سرقش غير لحظة هنا

طبعي كدا



بيني وبينك..

احسبي حسابك

على إن انا مُحْتَلّ

مش ناوى انسحاب

دَقَّيت خيامي كلها

على أرض صلبة فرشتها

بسنيين تكفّي ١٠٠ كتاب

وعملت سور عالي علينا

من الزمن ومن الصحاب

واذا كنتِ فاكِرة إن انا

من ثورة اسلمّ مملكة

أنا عشتها بين السحاب

أو إني اخاف هزّة هوا

أو ريح تعدّي بعندها

فتهزّ باب

لا.. افهمي يا ام العيون الدُّبلي

أنا الدرويش اللي بعشقك مُبتلي

ما يخافش أصوات الصدى

أو صدّها ف لحظة عتاب

مرووش وعایش معتكف

مع نبض عشقي المحترف

ماهي دنيا حافظ مكرها

وسيرة العذاب...

وان كان في بالك تغضبي

وتحُطِّي بيننا أي حاجة معقربة

وتتعصبي...

أنا خلاص بكل صدق فهمتها

وذاكرتها

ما انا شعري شاب

واتودّكت فيّا حكايات

كنا زمان بنهزّها تصفى مافيش

ونعدّها م الذكريات

وكنت اقول لك ما تخافيش

وتعدّي بينا كأنها حرف ف جواب

بما إني مش واحد غبي

عمّالة فيّا ترهّقي وتأنّبي

وكان انا مخلوق نبت من وسط غاب

مجهول دا ممكن..

إنما مجهول صريح

أو حتى يمكن إن انا

حرفوش ضريح

عايش طريح في العكنة

لكن ماليش في المَسْكَنَة

دا لإن انا ما اعرفش اعيش...

عيشة التعالب والذئاب

جاهل صحيح،

ومَدَبَ زي المطرقة

وساعات باطيح

دا لإنني واحد ع الهوا

ما اعرفش امثّل

تمثلية مبهوكة

ولا اخبني وشي في النقاب

أنا كدا..

ما اعرفش اقولها مزوكة

جوايا حارة واسعة جدًا ضيقة

وباحسّ لما الكون يضيق...

إني الغريق

والقشة بيني وبينها

ألف وميت حجاب

بازعل قوي من أي حد

يهمّني.. ويخصّني

ما اعرفش أمشي في الغلط

لو هانسخط

اللي فاهمني يلَمّني
لو حَسَّ إني تُهت منه
في الضباب
يزعق عليّ يضمّني
ما انا أصلي بأكره الانسحاب
طبعي كدا

مش حلم



حلمت...

وعيني كات لسه

هاتروح في النوم

في وداني سمعت الهمسة

ما كانتش عتاب ولا لوم

حسيتها بعبير النسمة

بتلاغي القلب المحروم

وصحيت وف عيني البسمة

واهو راح من عيني النوم

...

واتاريه مش حلم

ودي حقيقة...

ف رسائل من شوقها بتوصل

والقلب السهران بيكمل

في الحلم اللي انا عايشه حقيقة

وباشوفه بيدقّ ف قلبي

بين كل دقيقة ودقيقة

حداد



حداد...

بقلب الطير.. صنع جنازير

وساب روحه في ألف حدود

شاكوشه ف إيده كالريشة

بتعزف عود...

يرق القلب ع الدقة

نغم موال.. يقول لأه

لأي قيود

يا تعريشة...

بالهم الهمة في الصرة

وبارميها ف قرار البير

يا نافخ نار.. على الأسحار

ما عادش ف روي

غير دمي يطفئها

بالفّ وادور

وباتخبّط في ١٠٠٠ جدار

والّم ف روي وارقيها

بأدقّ ف صدري كام مسمار

واعلّق شوق وكام غنوة

أغنيها في ليل ونهار

باحسّ بروحي عايشة الداء

ومش قادر أداويها

يا عين محتاجة ١٠٠ منظار

تشوف عشقي ف أراضيه

شجر محتار
في غيم بكرة وحلم كبير
وخوفي لاكون أنا الفحمة
في نفخ الكير
وتطلع روعي في الدخان
أشوفني باطير
وإني خلاص
وصابني جنان
ما بين قضبان
كأني أسير

....

يا دقة الشواكيش...
يرقّ القلب ع الدقة

سبيينا نعيش

ونرسم خطوة ع السكة

حداد...

أنا مش سندباد

وغيرك يا حبيبتي ماليش

ومهما ألف بلاد وبلاد

أنا داقق هنا أوتاد

ورابط روعي بالجنازير

لما الأمل يصحى



شباك وستارة
وضيّ بيضحك
طول اليوم...
طبطب على كتفه
وقال له: كمّل نوم...
ولّا استنى
أمتّع عيني بنظرة
قبل ما اشوفك
في الأحلام
شوقي بيسبق
خطوة بخطوة

زي القمر البدري

ف أول ليلة

بيفرش ضيّ

ينور كل حوارى الحى

كان مستّى

الكلمة ف سهرة

مابتعرفش الليل من بكرة

زي الأرواح لما بتحلم

تلغى العقل ما عاdash يفكر

لكن جوا القلب حنينه بيكبر

يفرح.. يفهم...

إن الفرح مالوش مواعيد

هى النظرة، وحرف ف كلمة

يلقى الدنيا ف ساحة عيد

وبيترقص.. وببتمخطر

زي الفرس اتفكّ لجامه

وعاش أحلامه

وساب الدنيا لأهل الدنيا

وعاش العشق

ف كل دقيقة وثانية

وينسى النوم

يخطف نفسه لعالم تاني

يعيشه أناني

وتكثر جّوا القلب أمانى

يفتح كل ستاير عمره

يمسح وشّ مراية الخوف

صحح قلبه
يعيش موال وأغانى
يبان الشوق
في عينيه ملهوف
لما ما عادش يخاف من بكرة
واللي هايجرى
لما الأمل اتفكك أسره
وكسر الحيط
لما بيربط قلبه بقلبه
بنفس الخيط
يصحى الأمل النائم بدري
ويجري.. ويجري
لحد ما يفتح باب ف الشمس

ويضحك تاني

ويهمس همس

يخاف م النوم

يلمّ ستايره ف حضنه

ويفرح طول اليوم

والله وكبرت



والله وكبرت...

وعجّزت يا واد

والعشق ف روحك

بقى مَيَّه وزاد

عائش على حلمك

عصفور متشعبط

في خيوط الشمس

بتطير وتعدي السور

وتحس العالم بقی همس

وأغاني في ليالى النور

..

والله وكبرت...
وعجّزت يا واد
جوّاك الهمة
في العشق بتجري
وبتلفّ بلاد
لسّاك في العشق صغير
متعافي، ولسّاك بتغير
والغيرة ف دمك دخانة جير
بتبان على وشك
وكانك بتقشّقش عَشّك
بتلفّ وبتدور شبه المحتار
مش قادر تعقل
ما انت المملوك والمالك

والعشق اللي بيملا خيالك

بقى هو الليل اللي بيسهر

يستنى الفجر

بقى هو البحر

بقى هو الموج

اللي بسافر بسنين العمر

بقى هو الدقة

وشراع المركب

وانت البحار

..

العشق يا ولدي...

ما يجيش بالصدفة

ولا يقدر يهرب

العشق يا ولدي...
في الأصل ضمير
لا ينام الليل..
ولا حتى نهار
مش قادر تتقل وتداري
وتخبّي مشاعرك
ما انا عارفك..
ملهوف متشوّق
الشوق اللي منور عمرك
ومكمل بيه المشوار
..

الغيرة.. يا ولدي
حجرين في رحايا

وبتطحن حَبّات النار

..

مع إنك في العشق مرايا
على وشك تفاصيل لحاية

وكل الناس بيقرأوها

سطور الأشعار

ما هو قلبك

ما في هوش أسرار

..

والله وكبرت...

وعجّزت يا واد

وعزايمة في العشق شداد

ولسّاك جَوّاك يشبه برّاك

مش قادر تتغير
الكون في عينيك
م الأصل صغير
الغيرة يا ولدي..
في العشق هلاك
ما انت اللي رضيت بالعشق
ولا تقدر غيره تختار

حلمي



حلمك بيُفسر حلمي

مع إن الليل اللي ما بيننا

بيفضل صاحي...

لحد شروق الشمس

مستني رسالة تطلّعي

من بير اليأس

ما انا أصلي باشوفك في الحلم

وحروف بتصحّي الليل

مواويل.. وأغاني أفراحي

والشوق وليالي الصبر

وكلام ما اعرفش منين بتلم

أحكي لي وسمّني
أنا وحدي وبس
واسأل وأجوب
وأخط الأعداء وأسامح
وباطواع قلبي
اللي بَعاند واتصالح
وبينسى الأوجاع ويحنّ
وبيسرح ويتوه.. وساعات يتألم
وساعات في الصمت بيتكلم
وكأني شربت من النيل المالح
فبتطلع جَوَايا النار
وكأني ملبوس بالجن
وافتكّر امبارح

والشوق واللهفة،
وسلام الإيد والنظرة
واتطمّن حبة
شبه المولود في اللّفة
وف حضن حنين يتدفّى
ويعيش مش خايف بكرة
ولا خايف من زمن الضعف
أما بيرسم تجاعيد ع الكفّ
ولاحساس إحساس الضيف
اللي هايمشي.. ف حرارة الصيف
أنا بس الخوف اللي مالكني
وكانه السيف اللي مشقّق وشّي
مش عارف أنا ليه حسّيت

إني خلاص أصبحت
ف كواليس الذكرى
بتقطّع في ضلوعي الفكرة
مع إن الحب اللي أنا عايشه
مخلوق بالفطرة
معقولة الروح هاتعيش
ع الدنيا من غير أنفاس؟!
وايه يعني...
لو مرة حسدونا الناس؟!
أنا مؤمن بالعشق ومتحصّن
ومعتّق قلبي الإحساس
ماهو غصين عني
أما اتعصّب، واغضب

والغيرة ف أحزان ترميني

مع إني من حقي أغير

دا الحب اللي ماليني..

مخلّيني أطير

بني آدم حر..

بجناح عصفير

والله يارب انا حبيت

وبدمع العشق وأفراحه..

ياما اتوضّيت

وفرشت الشوق

على أرضي حصيرة

وكَبَّرت وصليت

أنا أصلي مريض بالغيرة

خائف لتأخذني المتاهات والحيرة

ولأصبح تفاصيل الصورة

المركونة على الحيط

مع إني والله يارب أنا حببت

وبدمع العشق وأفراحه

اتوضيت

افرح



افتح شبابيك في الليل
للقمر السهران في الحيّ
واتعلم ترسم شخايل
تترقّص على دقّ الضيّ
يا مراكبي بغني مواويل
وبيحضن شطّك
في الموج الجايّ
سيب بابك مفتوح للضحكة
فتعدّي بشويش الريح
وتكحلّ خديّك بسمة
في عيون مشتاقة لتسبيح

وبلهفة تخليك تستنى
فيه ساعات الليل بيعدي
في ساعات
وساعات يتحول لثواني
وكتير الليل بيهدي
يطول أوقات
يتحول الحان وأغاني
وتفتّح في الليل شبّابيك
مطلوب انك تفرح
زي القمر السهران
ما بيفرد منديله ويمسح
لو باقي دموع في عينيك
افرح

الحب يا سادة



الحب عايش...

والزمن هو الغريب

لَقَيْتُ كَثِيرَ عِ الْقَهَاوِي

سَمِعْتُ يَامَا مِنْ حِكاوِي

وَمِنْ غَنَاوِي...

عَنْ زَرْعِ عَارِفِ سِكَّتِهِ

وَأَزَايِ يَطِيبِ

وَشَفْتُ يَامَا كَامَ عِلَامَةٍ

وَدَمْعَةٍ رَايِحَةٍ

لِحَدِّ يُوَصِّلُ لِلنَّدَامَةِ

وفكرة سارحة.. وابتسامة

وباب يقابل أحلى فرحة

لما تحضن في الحبيب

وناس كثير في الحب تقلق

النفس جّواها يشهق

وناس بتتجى.. وناس بتغرق

وشعر أسمر...

لو يطوله الخوف يشيب

زمن بيحضّر في المواجه

والمسافر.. واللي راجع

واللي سعدده يلّم فرحه

في فجر طالع

واللي ناظر كلمة حلوة
من البعيد ومن القريب
واللي عاش الحب ضِلّ
واللي بتعب، والتعب جَوّاه يملّ
واللي بحزن...
واللي شايفه عبير وفلّ
الحب عُشب وفيه دوا
وهو الطبيب.. لناس كثير
الحب طَهَّر في المشاعر
خلّى نور ع الخد ظاهر
صحّى فيهم روح جديدة
وقلب طاهر...

خَلَّى ناس بالعشق آمنت

كل شئ قسمة ونصيب

الحب كلمة...

فسرّوها ف ١٠٠ كتاب

الحب معبد...

ينفتح له ١٠٠٠ باب

الحب جنة ونار

في لحظة مالوش حساب

الحب جاي...

والزمن هو اللي رايح للمغيب

الحب خَلَّى القلب يبقى شئ بريء

ساعات يخلى الكون يضيق

لما يجرح.. وأما يفرح
يرسم الأيام في صورة
الأمل فيها جريء
الحب و العشاق في دنيا
يبقى متعة وحاجة تانية
يبقى دَلَّة لما يكوي باللهيب
الحب حيرة...
جَوّا دايرة مستديرة
حاجة حلوة.. زي خلوة
فيها جنة وفيها غيرة
فيها شوق...
فيها قلب يطير لفوق

نسمة حارة

وحرة دائماً مش أسيرة

الحب قلب ف حزن قلب

دقة واحدة تروح لبعض

مين يشدّ ومين يسيب

... ~

الحب...

يخلي الرملة سجادة

بلون أخضر

وترضى قلوبنا ف عبادة

بكل إرادة بتسبح وبتصلي

وبتكبر

وبتآمن بعلم الغيب

الحب يا سادة...

قدر مكتوب

وفيه غالب وفيه مغلوب

وناس ياما...

في وجع الحب تتعذب

ومش قادرة بجد تتوب

الحب يا سادة

إنتِ السبب



أحلف يمين الله

لو دقّ قلبي بآه

يشهد عليك ربنا

إنتِ السبب

لو عيني دبّلت م السهر

واتحيرت زي القمر

لما بيحكي عنّا

برضه هاقول انتِ السبب

مش نيّ



البندقية طلقها

خلف الضلوع

غَزَلَ الحكايه كلها ف نوله الغبي

ورичه الخفي يطفى الشموع

قاصد يسيب ضيّ القمر

في الصيف يجوع

في البرد لو طال المطر

عَيَّل أسير..

العشق فيه محراب نبي

وانا مركبي فاردة القلوع

عاشق وعشقي مذهبي

القلب كاتم ع النَّفس

خلف الدروع..
نسر البراري اللي انكسر
بين الربوع
عدّى الموانع كلها
ساب الشجر
يحلم بأحلام الغريب
الشمس فوق حد النظر
ساعة السطوع
بتسلّم إيدين القلب للعشق الخطر
يوذّع زمان المخرطة
من غير رجوع
لسه الحدادي محوطة ع النسر
مش عارف يطير..
خاطفين بهيّة امّ القمر

من عين ياسين
الثورة ساعة وتنتهي
والبنديقه بتتكسر
خلف الستار...
أما الحدادي معسكرة
وف شنطة صفرا مربطة
طوب الجدار
عمالة تحرت في البدن
شبه القراة ف لؤمها
يظهر في صوتها حقدھا
بطول النهار
يا عنكبوت مالك ومال عبلة؟!
عنتر ما كانش العبد
ولا طاوع الأسياد

مالك ومال عشقه؟!

بينك وبينه بلاد

النخوة ف خيطانك وهن

عنتر ماهوش شراشيب

ولا منسي م الأمجاد

لكنه طاوع وامتل

كالبنا والحداد

زي الحديد ساعة الأمل

دائماً يلين

عنتر إمام...

صلّى وراه عاشقين

وناس كثير زهاد

يا عنكبوت اختشي

أصلك خسيس وجبان

يا عبلة عنتر حي
هاتموتيه إنسان
ازاي يكون عاشقك
ترميه في بير أحزان
البندقية نار...
تشبه كثير الرُمح
صوت الحدادي الغبي
يشبه لخيطة عنكب
يصعب علينا الجرح
لو كان بناب تلعب
يا بهيَّة قومي اخرجي
شوفي شواشي الفرح
فُكِّي الحصار الاصفر
واتعوّذي م السحر

العشق مش هايموت
لكن في يوم عاشقك
ممکن يموت م الجرح
كل الحدادي تطير
صوت الحزين جبار
أقوى قوي من النار
وياسين...
العشق فيه الوتد
مدقوق في قلب الدار
لا حدادي تقدر تقلعه
ولا التحاويط..
تقدر تهدّ جدار
نابت في صدر ياسين
يا عبله عنتر حي...

كل الزمن بيروح
عنتر زمانه جايّ
لَمْ النياق الحُمر
مزامير بتطرب حي
عنتر مالوش في السحر
لكنه فارس عشق
بيبان في عينه ضيّ
موجة تهزّ البحر
تطلع لسابع برّ
والعشق فيه طيّب قوي
سمّيه بغيرته مستوي..
مش نيّ

الفهرس

م	العنوان	الصفحة
١-	إهداء	٣
٢-	ماتستنيش	٥
٣-	الغيرة	١١
٤-	التصويرة	١٥
٥-	يا ام القصايد كلها	١٨
٦-	لو حلمك اتاخر	٢٦
٧-	إمام العشق	٣١
٨-	ولا عمري هاخاف	٣٥
٩-	مقام العشق	٤١
١٠-	جربت	٤٨
١١-	شايفك وطن	٥١
١٢-	دفا وحنان	٥٥
١٣-	سبيينا نعيش	٥٨
١٤-	خصام	٦٣
١٥-	مش قلت لك	٦٨
١٦-	هذا الكائن	٧٢
١٧-	يادي الجمال	٧٧
١٨-	طبعي كدا	٨٠
١٩-	مش حلم	٨٦
٢٠-	حداد	٨٨

م	العنوان	الصفحة
٢١-	لما الامل يصحى	٩٢
٢٢-	والله وكبرت	٩٧
٢٣-	حلمي	١٠٣
٢٤-	افرح	١٠٩
٢٥-	الحب يا سادة	١١١
٢٦-	إنتِ السبب	١١٨
٢٧-	مش ني	١١٩